




Biografia

Edward (Eddy) Augustus Bennett a nace dia 18 di augustus 1933 na Aruba. Na 1951 el a caba MULO y a bai studia pa maestro di scol na Baarle-Nassau, Hulanda. Na e "kweekschool" unda e tabata studia el a siña toca piano serca frere Alfons (Dumaine). Na e conservatorio di Tilburg el a tuma les di canto. Na 1955 el a regresa Aruba como maestro graduá.

Den e mesun aña el a bai toca piano den e conhunto di e trompetista Arnold Beyde. Na 1956 el a forma parti - riba piano tambe - di e conhunto "Sensacion Musical". Den e areglacion aki el a cuminsa experimenta como areglista.

Den e periodo 1955 - 1962 Eddy Bennett a compone bastante, pero e no tabata trese su composicionnan den publicidad. For di aña 1978 e ta drenta cada bes mas den publicidad como compositor. Na diferente evento musical - mas tanto di e Festival OTI - su composicionan, cu letra di su casa Eugenia (Nena) Bennett - Piternella, a gana premio.

Mayoria di e composicionan di Eddy Bennett ta pa mucha. E tabata tin un inclinacion especial pa musica di mucha. El a compone dos "musical" den e genero aki. Na aña 1982 un di su composicionan "E pushi preto" tabata e mihó den e categoria di mucha den e festival "Voz-i-Landia."

Den e concursionan di tumba tambe Eddy Bennett a destaca como compositor y areglista. Varios di su tumbanan, canta pa Juancho Kock, a gana premio den e categorianan di composicion y areglo.

E actividadnan artistico di Eddy Bennett no a keda limitá na e tereno di musica solamente. El a compone musica pa varios obra teatral dirigi pa Burny Every, entre otro pa "Un anochi largo" y pa "Stima bo mes mas cu bo prohimo." Den e añanan 1983 y '84 el a colabora cu e cineastanan Wilbert Tecla y Pim de la Parra, componiendo musica pa nan pelicula, entre otro "Odyssee d' amour."

Eddy Bennett a dedica su mes tambe na investigacion musicologico. El a analisa varios aspecto di e musica di Aruba. Den e revista "Skol & Komunitat" el a publica varios articulo relacioná cu su investigacionnan. No ta tur su estudionan di e musica aki ta publicá ainda. Ta di spera cu esey lo sosode pronto postumamente.

Eddy Bennett a fayece riba 17 di februari 1989.

